

17
Q. D. B. V.

SPECIMEN INAUGURALE MEDICUM

DE

HERNIA CEREBRI

SUB PRÆSIDIO DIVINO

GRATIOSÆ FACULTATIS

INDULTU

PRO LICENTIA

SUMMOS IN ARTE MEDICA HONORES

ET PRIVILEGIA DOCTORALIA

LEGITIME IMPETRANDI

SOLENNI ERUDITORUM EXAMINI

SUBJICIT

JOH. FRIDER. CHRISTIANUS

CORVINUS

WESTERBURGENSIS

AD DIEM XXIII. SEPTEMBR. ANNO MDCCXLIX.

ARGENTORATI

Ex OFFICINA PAUSCHINGERIANA.

DEO
PATRIÆ
PATRONIS
atque
AMICIS.



§. I.

QUamvis, docente Anatomia, nobilissimum cerebri viscus suis membranis, dura nimirum ac pia matre, involutum, & theca ossea, ex octo firmissimis cranii ossibus compacta, inclusum loco suo naturaliter excedere nequeat; fieri tamen nonnunquam potest, ut in prima conformatione pars cujusdam ex dictis ossibus deficiat, sicque, relicto inter coercentes partes hiatu, inæqualiter sustentati cerebri portio per illud cavum prorumpat, quæ tum membranis propriis, tum integumentis capitis communibus tecta, tumorem format, quem ex reliquarum herniarum analogia haud inepte *Herniam Cerebri* aut *Encephalocelen* appellare possumus.

§. II.

Rarior hujus affectus apud observatores mentio occurrit. Aliis dijudicandum relinquo, num casus SCRETÆ apud HILDANUM *Cent. VI. obs. XVII. p. 512.* aut FORESTI *Obs. Chir. Lib. III. obs. 7. Tom. IV. opp. p. 73.* vel JOBI A MEEKREN *Obs. Med. Chir. cap. VII. p. 51.* five RUYSCHII *Obs. Anat. Chir. obs. 52. p. 69.* seu JACOBÆI in BARTHOL. *actis Hassn. Vol. II. obs. 33. p. 80.* seu Anonymi in Cl. HEBENSTREITH *Diss. de Capiton-*

pitonibus Laborioso partu nascentibus §. 19. huc trahendi sint. Ast REISELII observatio de Cerebello extra cranium sito quæ in E. N. C. Dec. II. Ann. 2. Obs. 115. p. 272. legitur, omnino ad cerebri hernias referenda est, ubi narrat, infantem recens natum in nucha habuisse tumorem durum, tensum, magnitudine duarum nucum cortici adhuc inclusarum, qui apertus serum lymphidissimum ad quatuor unicas emisit, tandem materiam purulentam stillans post septem hebdomatum decursum morte tragoediæ finem imposuit: post mortem apertus ostendit cerebellum per foramen proprium, cum foramine magno ossis occipitis conjunctum, elapsum in tumore latuisse. Primus interim, quantum novi, qui morbum hunc, novo hoc, maxime adæquato, nomine salutavit, & quod magis, curare docuit, Solertissimus est Galliæ Chirurgus HENRIC. FRANC. LE DRAN cujus observationem Chirurgicam primam in compendio huc transferre non pœnitebit. Recens natus infans in regione capitis parietali dextra tumorem mollem, indolentem, totam fere ejus superficiem occupantem, ad pollicis regii altitudinem elevatum, cum aliquo fluctuationis sensu, habuit: & quoniam in circumferentia tumoris in ipso osse circulus digito explorari poterat, qui ossificationis imperfectæ suspicionem præbebat, Herniam Cerebri subesse arbitratus, lintea complicata, densissima, spiritu vini imprægnata, solo, eoque consueto capitis infantis involucre sustentata, superimposuit, & sine nova facta humectatione per 24. horarum spatium ibidem reliquit, eum in finem, ut lintea ista complicata, exsiccatione duriora facta, tumorem leviter sustentarent, eumque molli compressione mox comprimerent, sicque dilatatis vasis sensim elaterem redderent, ut, contractis partibus, ossis defectus nova ossificatione restitui possit. Nec eventus
spem.

spem defraudavit, elapso enim mensis spatio tumor integre evanuit, quo temporis intervallo os temporale sensim ossificatum circulum istum de die in diem ita imminuit, ut non nisi in centro ejusdem parvum foramen fuerit relictum, quod & ipsum elapsis decem mensibus coaluit. Sic & Excell. D. D. TREW in commerc. Liter. ad A. 1738. hebdom. 52. n. 3. p. 412. infantis meminit, in cujus capite super os verticis sinistrum prope ipsum verticem & occiput prominebat tumor, floreni circiter magnitudine & pollicem ferme altus, sic & in altero latere similis tumor minor licet aderat, qui tamen sponte evanuit. Non difficile erat in ambitu tumoris hiatus ossis detegere. Infantem hunc Celeber. Observator eodem modo ut LE DRANIUS cum sanitate in gratiam reduxit.

§. III.

Et ne asymboli discedamus sequentem casum dabimus. Civi honesto hujus urbis A^o. 1741. d. 29. Julii nascebatur filiolus a cujus occipite inter utramque aurem admirandus tumor dependebat: radicis ejus diameter transversalis spatium duorum digitorum cum dimidio, longitudinalis sesqui digitum confecit, inde augendo progrediens longitudine sex, latitudine quinque, crassitie tres digitos replevit. Superficies ad radicem tumoris capillis undique obtecta, post se cutim glabram, inæqualem, lineis quibusdam callosis, quasi cicatrifatis, interstinctam, præcipue in margine ejus sinistro, reliquit. In fundo tumoris à radice versus ejus corpus serpens lata cuticulæ excoariatio aderat. Tactu, imprimis ad radicem tumoris, partes solidæ instar membranarum in se convolutarum explorabuntur; reliquam ejus portionem liquidum replebat, quod in altum sublato tumore

versus cerebrum recedebat, ast demisso eodem, pristinum rursus locum occupavit, & tumor uno in margine digitis percussus, fluctuationem in altero latere, ut in ascite fieri solet, sensibus obtulit. Die XXX. ejusdem mensis, hora 5. matutina advocatus Experimentissimus, &, ut in omni arte Apollinea, sic in obstetricia potissimum morborumque mulierum & infantum scientia longe celeberrimus Dominus Doctor FRIED (qui, cum famam ejus tot in universa fere Europa dispersi discipuli, magno mortalium emolumento loquantur, laudibus meis qualibuscunque omnino major existit) una cum Chirurgo exercitissimo & Anatomico Lynceo, *νῦν ἐν ἀγίοις*, accurate instituto examine & pensitatis cunctis, maluit anceps experiri remedium, quam nullum. Incisione ergo, mediante lanceola, in inferiore margine tumoris facta, effluxit lymphæ ex flavo rubescens, satis copiosa, & hanc cystidem, sola extensione integumentorum communium capitis formatam, penitus evacuavit. Sufficiens deinde per incisionem cruciformem dilatato vulnere, duæ adhuc cystides, sinistrorsum magis locatæ, sibi invicem accumbentes, & priori cystidi inclusæ, in conspectum prodibant, quarum dextra rotunda & major erat, sinistra minor & oblonga: exterior utriusque superficies æqualis, glabra, aliquo modo tendinea splendensque, ab innumeris vasorum ramificationibus & inibi stagnante sanguine atrolivescentis coloris, ex utroque latere ad internam cystidis communis faciem per productiones, quasi per duo ligamenta falciformia adhærebat. Tactus similis contenti fluidi suspicionem genuit, factaque nova incisione revera oculis subjecit. Ad radicem cystidis dextræ, eductis aquis, corpusculum rubicundissimum, in aquis fluctuans, semi pollicis longitudine,

ne, portionis plexus choroidei referens formam, apparuit. In illam ex quo dictum corpus prodiit cavitationem, stylum exploratorem ad sesqui pollicis spatium in cerebrum immittere, corpus tamen ipsum digitis penitus reponere non potuit operator. Quædam insuper duræ menyngis falces protrusæ aderant, quæ corpus illud solidum, quod tactus, ut diximus, externe sentiebat, constituerunt. In ipsa operatione sub apertura omnium cystidum & educatione aquarum, nullum nec sensus nec doloris signum edidit infans, nisi quod ad styli exploratoris intrusionem humeros aliquoties sursum moveret. Cystides duæ internæ cum ista plexus choroidei portione tegebantur plumaceolis, vino calido, aqua Reginae Hungariæ acuato, imprægnatis; iisque super inducta cystide communi, seu externa, linteo leniter comprimente & fascia, integumentum capitis (*couvre chef*) dicta, muniebantur. Reliquam diei partem tranquille, quasi in lethargo dormiens, sine cibo potuve transiegit pusio, & sub respiratione debilissima, nulloque extremitatum motu, vix semel iterumque oculos aperuit, excretionibus tamen alvinis naturalibus satisque copiosis succedentibus. Remotus sub vesperam apparatus sero sanguinolento copioso fœtido humectatus apparebat: Cystides partim gangræna corruptæ, partim insigniter tumefactæ, & pure albicante hinc inde obtectæ erant. Interiora tumoris mane frigida, nunc æqualiter undique calebant, respiratio paulo fortior, & palpebram sinistram, debili licet motu aperuit. Rebus sic stantibus, cum omnia tristem nuntiarent prognosin, membranas non rescuit operator, sed supra dicto modo denuo vulnus deligavit. Misellus noster die XXXI. Julii hora quinta matutina, emisso prius, quod antea per breve vi-

tæ spatium nondum fecerat, ejulatu, animam exhalavit, & aliquot interjectis horis, ad phænomenorum haud vulgarium causas explorandas, cultro anatomico subiectus est. Ad os parietale dextrum sub pericranio obtulit sese tumor sanguinolentus satis copioso sanguine extravasato, pericranium a dicto osse penitus separante atque protrudente, repletus. Totâ insuper lateris dextri infra oculos portio rubra tumidaque apparuit: sinistrum quoque bregma sanguinis extravasati portio tegebat; quæ quidem symptomata inclinationi & compressioni capitis durante partu factæ tribuenda esse videntur. Remotis hinc ex utraque parte ossibus parietalibus, osse frontis & occipitis in situ relictis & aperta dura matre, cerebrum naturali quidem colore, ast consistentiæ mollioris, mucosæ, quasi maceratæ in conspectum prodiit. Deinde cerebrum repetitis ex arte sectionibus ad corpus callosum usque Anatomicus abstulit, apertisque lateralibus ventriculis, in corporibus striatis, magis tamen in sinistro, oblongas callositates vasculis intertextas observavit. Corpus callosum fornici per massam solidam, densam, absque interjecto septo lucido, continuum erat. Thalami nervorum opticorum non coaliti: sed remoto fornice statim in conspectum prodiit ventriculus tertius, satis spatiosus, & cum ventriculis lateralibus unum quasi cavum commune constituens, quod retrorsum magisque sinistrorsum supra eminentias quadrigeminas vergens, per foramen p. n. occipitis mox describendum in duas istas cystides interiores terminabatur. Evidenter hic ventriculus ostendebat, corpusculum istud rubicundissimum, ex radice cystidis dextræ egrediens, cujus supra mentionem fecimus, veram plexus choroidei continuationem fuisse. Loborum posteriorum cerebri

bri extremitates itidem in istud foramen p. n. ossis occipitis tendebant, ita ut a parte externa cerni tan-
 gique potuerint. Integre remotis dictis lobis nul-
 lum tentoriorum cerebelli vestigium apparuit (quip-
 pe quæ per foramen p. n. protrusa duas cystides re-
 censitas constituebant) hinc lobi posteriores cerebri
 immediate cerebello incumbebant. In ipsa denique
 superiore & maiore ossis occipitis parte ob defectum
 protuberantiarum occipitalium ipsiusque substantiæ
 osseæ foramen aderat præternaturale, figuræ ex trian-
 gulari ovalis cujus portio magis rotunda basin, acu-
 minata vero apicem constituebant: Margines fora-
 minis, læves, crassiusculi, subrotundi, ex duobus quasi
 femiarcubus compositi videbantur, quorum extremi-
 tates inferiores non coalitæ, sed per substantiam in-
 termediam, ligamentosam, satis validam, quatuor
 aut quinque lineas longam, connexæ erant, & quæ
 quasi sepimenti munere inter foramen p. n. & fora-
 men magnum occipitale pro transitu medullæ spina-
 lis fungebatur.

§. IV.

Cum medulla spinalis non tantum sit continua-
 tio cerebri, sed & pari ratione theca ossea involva-
 tur, quid mirum, & ipsam, deficientibus ob malam
 primam conformationem vertebrarum quarundam
 processibus spinosis, loco suo excidere, aut, quod
 frequentius evenit, in tumorem serosum degenera-
 re posse, quem ob summam, tum ratione causæ, tum
 partis affectæ analogiam ad herniarum cerebri species
 referre vix est quod dubitemus. Frequens certe
 experientia ratiocinium nostrum confirmat. Videsis
 SCHENCKIUM *Observ. Med. Lib. V. obs. 48. 51. p. m.*
56. 63. TULPIUM Obs. Lib. III. c. 29. & 30. p. 229.
seqq.

seqq. MUYſ *Prax. Med. Chir. Dec. IX. obs. 5.* RUY-
SCHIIUM *Obs. Anat. Chir. obs. 34. 35. 36. p. 45. seqq. &*
epist. probl. XII. p. 24. B. SALTZMANNUM *in Dissert. de*
Tumoribus quibusdam ser. ext. §. 3. & 4. STALPARTUM
VAN DER WIEL *Obs. rar. cent. post. obs. 34. Tom. II.*
p. 368. WALTHERUM *Thes. Obs. Med. Chir. obs. II. p. 13.*
SCHROECKIUM *in Scholio ad obs. 115. dec. II. a. 2. E.*
N. C. BURGIIUM *ibid. dec. II. a. 6. obs. 58. p. 141.* BRUN-
NERUM *ibid. dec. III. a. 1. obs. 152. p. 352.* MAURIT.
HOFFMANNUM *ibid. dec. II. a. 5. obs. p. 431.* APINUM
ibid. dec. III. a. 9. 10. p. 310. MAUCHARTUM *ibid. Cent.*
9. obs. 38. p. 92. D. D. TREW *Commerc. Lit. a. 1741.*
hebd. 20. no. 1. p. 154. Similem quoque casum olim
in hac urbe observavit D. D. SCHURER, vir multiplici
doctrina & felicissima praxi clarissimus, quem ut ipse
aliquando cum aliis rarioribus suis observationibus
luci publicæ committere velit, anxie optamus. In
cunctis ceterum observationibus allegatis malum oc-
cupaverat regionem lumborum & ossis sacri ad am-
bitum nunc unius nunc plurium vertebrarum, &
consistit in inundatione spinalis medullæ, cum in-
tumescentia & dehiscencia tegumentorum commu-
nium, atque processus spinosi vertebrarum lumbarium,
aut partis ossis sacri posticæ portio, deficiunt;
hinc quoque auctoribus *spina bifida* audit. Et qui-
cunque hoc morbo laborarunt omnes mortui sunt
conf. egregium Schediasma Celeber. TREWII *l. c. &*
hebd. 21. p. 161.

§. V.

Herniam denique cerebri stricte sic dictam cum
modo recensita spina bifida posse conjungi, cum con-
tradictionem non involvat, experientia erit con-
sulenda, num hæc actu coextiterint unquam. Me-
moran-

morandus certe casus est *LECHELII in E. N. C. Dec. II. a. 2. obs. 158. p. 363.* ubi de recens nato infante loquitur, quod duos habuerit tumores, unum in medio occipitis, juglandem magnitudine æquantem, tactu mollem, pilisque obsitum, alterum in spina dorsi, ovi magnitudine, qui morbus tandem in completum hydrocephalum terminatus, misellum e vivis sustulit. Post mortem tumores lymphâ repleti, in lumbis spina bifida, & in osse occipitis foramen rotundum præternaturale reperta sunt.

§. VI.

Num vero simile quid in adultis contingere possit, si pars cranii vel morbo, vel vi violenta externa ablata sit, despiciendum erit. Non me tale quid in recensione læsionum cranii legisse apud observatores memini, nisi *in E. N. C. Dec. II. a. 1. obs. 167. p. 393.* ubi *KOENIGIUS* mulierem in scenam producit, ex cujus cranio carcinomate exeso, cancro corrupta insimul dura matre, cerebrum nudum pomi magnitudine protuberavit, subsequente rationis vacillatione; sopore & apoplexia lethali. Quod si vero consideres, herniæ intestinalis aut omentalis ideam non absolvi, quando dicta corpora ex vulnere vel ulcere abdominis aperto prorumpunt, sed tum demum in herniarum classem referri, quando rupto, vel dilatato peritoneo, illæsa cute, musculis aut scroto, e loco naturali excedunt, modo recensitam historiam quoque inter hernias cerebri locum non mereri judicabis, quoniam nudum protuberavit cerebrum. Ideoque nec in sequentibus ejus mentio fiet. Multo minus hic fungorum cerebri ratio habetur, quando teste *MALPIGHIO de Cort. Cerebr. c. 4. p. m. 85.* exulcerantur externis vulneribus corticales cerebri glandulæ, & in

B

insignes

insignes exurgunt excrescentias (conf. quoque Cl. HALLERUS *in commentar. ad Inst. Boerb. Tom. II. p. 495.*) præterquam enim quod de iis idem sit ferendum iudicium, quod de cerebri protuberantia modo dedimus, status hic præternaturalis cum naturali minime comparandus erit, cum in hernia cerebri cerebrum naturaliter sit constitutum, aut naturali proximum, in hoc vero casu exulceratum. Spinam bifidam quod attinet, illam bis in adultis APINUM observasse recenset HOCHSTETTERUS *in dissert. de spina bifida Altorf. 1703. habita* §. 19. semel inter scapulas in virgine 20 annorum, & altera vice in foeminæ 50 annorum ossis sacri fine; cum vero non satis describat, an revera processuum spinosorum adfuerit dehiscencia, an vero tumor alius lymphaticus tantummodo in his regionibus natus fuerit, rem, donec uberior nos realitatem & existentiam phænomeni doceat experientia, in dubio relinquo. Consentit Cl. TREWIUS, & hos tumores a spina bifida diversos fuisse iudicat. Exulceratus iste in spina dorsii & lumbaris pueri quatuor annorum tumor, quem TH. BARTHOLINUS *Hist. Anat. Cent. I. obs. 30. p. 42.* profert, si quidem spina bifida fuit, a nativitate, ni me omnia fallunt, sic docentibus reliquis circumstantiis, aderat, licet de ea re nil dicat accuratissimus ceteroquin observator. Recte ergo forsan concludo, herniarum cerebri & medullæ spinalis existentiam in adultis vel non dari, vel adhuc dum non clare demonstratam esse.

§. VII.

Quod si allegatas hucusque observationes paulo accuratius rimari & inter se comparare velimus duplex Encéphalocèles genus erit statuendum, unum quod *cerebri* ipsius, alterum quod *medullæ spinalis* her-

herniam comprehendit : utrumque rursus duas habebit species, eritque *Encephalocele simplex*, ubi tumor tantum cerebrum aut medullam spinalem complectitur (qui quidem casus rarius est, & in supra citatis exemplis non nisi in Cl. TREWII casu occurrit) & *composita*, ubi tumor præter cerebrum aut medullam adhuc plus minus serosæ colluviei includit, quam speciem si *Hydro-Encephalocelen* nominare velis, me non habebis refragantem. Porro erit & alia hujus herniæ compositæ species, quando, ut in casu LECHELII §. 5. & hernia cerebri & spina bifida uno eodemque in subjecto reperiuntur. Hernia cerebri ipsius subdividi poterit in *herniam cerebri* stricte sic dictam (vid. LE DRANII TREWII & noster casus) & *herniam cerebelli* (vid. casus REISELIANUS) ratione loci hernia cerebri ipsius est vel *lateralis*, vel *verticalis* (hoc est in superiore capitis regione) vel *occipitalis* (aut in nucha) & hernia medullæ spinalis vel in *lumbari*, vel in *ossis sacri* regione reperitur. Denique respectu eventus herniæ hæc in *sanabiles* & *insanabiles* dividi poterunt.

§. VIII.

Causam herniæ cerebri proximam in deficiente aut imperfecta partis ossis cujusdam, cranium aut spinam lumborum vel ossis sacri constituentis, ossificatione quærendam esse, omnes citatæ historiæ uno ore pronunciant. Quænam vero hujus ossificationis deficientis causa sit, accuratius nunc inquirendum erit. Cerebrum cum annexa medulla spinali primum nutritionis, sensus motusque instrumentum esse, & in corticali sua substantia liquidum secernere, quod per fibras medullares nervis infundit, Physiologia demonstrat. Antequam ultima hæc purissimi

B 2
liquidi

liquidi secretio contingit, a sanguine separatur latex renuis, lymphæ inter humores C. H. visibiles subtilissima (*conf.* BOERHAVE *Inst.* §. 274. No. 4.) quæ magna in copia in cerebro reperitur, illud irrigat, ab exsiccatione & concretionem præservat, & munere suo functa ad cor redit (*Idem l. c.* §. 295.) Eas porro partes, quas in adultis ossa vocamus, in embryone ab initio esse mollissimas, in capite præsertim membranæ simillimas, at sensim majorem acquirere duritiem, quem actum ossificationem salutant, osteogenia fœtus ostendit. Supponamus nunc lympham istam cerebri, sive ex propria spissitudine, hincque nata διαπνῆσις aut διαίρεσις, sive ex nimio ejus motu & subtilitate, hincque orta ἀναστόμωσις, sive ex impedito ejus quacunque de causa ad cor refluxu, in cerebro coacervari, stagnare, extra sua vasa effundi, orietur morbus quem *Hydrocephalum internum* (a) dicunt, qui successu temporis sub majore humorum
coa-

(a) de hydrocephalis videantur schediasmata & observationes PETITI *Mem. de l'Acad. des Sciences* a. 1719. p. m. 121. REIMANNI in *Breslauer Sammlungen Tent. XVI. S. IV. art. XIII.* p. 641. SEMLERI atque HERMANNI *ibid. Tent. XXXII. S. IV. art. 23.* p. 541. & *Tent. XXXIV. S. IV. art. 11. 12.* p. 460. sq. MOWAT & PAISLEY *Essais & Observ. de Medicine de la Societe d'Edinbourg Tom. III. obs. 22. seq.* p. 406. SEVERINI *de recond. abscess. natura Lib. IV. c. 9. §. 2.* p. 183. aliorumque in E. N. C. quos lubens hic prætermitto. Audivi fuisse ante hos viginti circiter annos in prædio, prope hanc urbem situm talem Hydrocephalum internum, qui ad duodecimum usque annum miseram vitam protraxit. Longitudo integri corporis tres pedes, caput vero, dimidium totius longitudinis, repleverat, facies parva & rugis obsita, cranii moles stupenda, nec sensus, dolorem si excipias, nec motus ullum signum, fames canina, convulsiones leviores subinde affligerunt ægrum, semper duo homines requirebantur, quando e loco in locum transferre voluerunt, ubi unus caput alter reliquum corpus sustentabat.

coacervatione ossa cranii distendit, capitis volumen misere adauget, & cerebri substantiam molliorem, flaccidiorem minus compactam atque minus cohaerentem reddit. Perge fingendo, lympham istam extravasatam, antequam in plenarium Hydrocephalum degeneravit morbus, plus premere unam ossis cujusdam cranii partem quam reliquas, aut, quod idem est, illud os à causa quacunque externa magis premi quam cetera, comprimuntur vasa, hinc nutritio & ossificatio ejus partis impeditur: cumque, ceteris paribus, membrana minus pressioni cerebri & lymphæ resistat, quam os, vicina mollioris cerebri, & extra sua vasa fluctuantis lymphæ portio membranas (tum istam quæ ossis vices supplet, tum duram piamque matres) pressione sua sensim distendit, & musculos cutemque in tumorem elevat. Nec refragatur huic theoriæ objectio, quasi his suppositis frequentior esse debeat morbus, quam actu reperitur; omnes enim infantes spatium quoddam in vertice gerunt, quod nullo osse sed sola membrana regitur, cur non ea pari modo a cerebri pressione dilatatur? Sed si consideremus, quod eo in loco, ubi fontanella (sic membranam istam vocant) reperitur, duplicatura duræ matris, quæ falcem ejus format, frenum satis robustum constituat, quo minus cranii fornix cedere & herniam formare possit, objectio satis diluitur. Adde, quod situs naturalis infantis in utero capite sit magis erecto quam depresso aut inverso, quo in casu contenta ejus minus prement in verticem, quam in latera aut basin, ita ut ne sic quidem eo in loco herniam constituere valeant, & licet sub ipso partu, aut foetu in lucem edito situs capitis sit inversus aut magis horizontalis, eo tamen in casu partes jamjam magis sunt firmæ minusque loco suo cedere norunt, etenim,

si fides historiis habenda, affectus noster non nisi in utero & mollioribus adhuc existentibus partibus, contrahatur. Quod si denique supponatur lympham istam cerebri extravasatam viam invenire, per quam ex capite in medullam spinalem destillare potest, proprio pondere descendet aqua, quousque potest. Hoc est, in imam thecæ vertebralis regionem, sive lumbarem aut ossis sacri deveniet. Docet vero KERCKCKERINGIUS in *Osteogen. fæt. cap. 12. p. 239. & Tab. 39. fig. 5.* infantum spondylos ex tribus ossiculis, cartilagine inter se commissis, conflatos esse, in hanc cartilagine si humor defluens incumbit, illa emollitur, ossicula paulatim dirimuntur, spina diducitur, & musculi cum integumentis in tumorem surgunt. Quam theoriâm LECHELII casus, §. V. citatus egregie illustrat.

§. IX.

Ad causas occasionales mali referunt nonnulli depravatam, aut terrore perculsam matris imaginationem: sic fœminæ, in historia REISELII, felis circa collum impositus, qui aliquamdiu partibus collo vicinis adhæsit, unde infans tumorem in nucha accepit, ejusdem coloris pilis obsitum, ac felis cervici impositus habebat. TULPIUS rapam prægnanti denegatam, mulierem hinc lumbos suos percutientem, accusat. Idem, nec non B. SALTZMANNUS gravem in lumbos lapsum, & inde productam spinam bifidam recensent. Alii alia producant. Non me latet modernorum Medicorum plurimos, præcipue Anglos Gallosque, imaginationi maternæ omnem vim in formatione aut destructione fœtus denegare (b)

pro-

(b) Egregie ventilatam hanc controversiam vide in Celeb. HAL-
LERI *Commentario aureo ad Inst Boerb. Tom. V. P. II. p. 521. sqq.*

propterea tamen (ut verbis utar Cl. TREWII l. c.) negare nolim , imaginationem vel concussionem matris gravem nil plane ad hoc malum conferre posse ; quin potius omni probabilitate cavere mihi haud videatur , utramque causam , quatenus cerebrum & cum illo continuam medullam spinalem matris afficere potest , eatenus eandem , sed tanquam causam remotam , partes infantis easdem alterare & ad statum morbosum disponere. Quod si vero ex altera parte considero , tumores tales sine prævia matris imaginatione alterata natos esse , ut ex LE DRANII , TREWII , & nostro casu apparet , existimarem quoque , non facile ad illas dubias remotasque causas in pathologicis confugiendum esse , omissis aliis propinquiorebus , quæ absque difficultate ex ipsarum partium fabrica cognoscuntur. De situ infantis p. n. in quantum tanquam causa occasionalis aliquid ad producendum affectum nostrum contribuere possit , hic nil addo , cum tacentibus hac de re historiis in tanta rerum caligine præter conjecturas vix certi quid producere valeam ; conf. interim B. SALTZMANNUS l. c. §. XI. Idem vir in ceneribus adhuc mihi colendus §. 8. & 12. laboriosum partum in causis spinæ bifidæ incusat , *capite enim , inquit , in cæcibus ossis pubis diu hærente , collum & jugulares venæ quasi strangulantur , unde humoribus , à capite refluerent non valentibus , stagnatio seri in cerebri ventriculis contingit. His si accedit , ut dorsum fætus nimium incurvetur , vel alio modo vertebra dissolvatur , humores accumulati medullæ spinalis involucra distendunt , & in tumorem elevant.* Quæ quidem verba egregie huc trahi possunt , si supponas , antea jamjam in utero lymphæ aliquam copiam in cerebro extitisse , ossis , si ve cranii , si ve vertebrarum partem defecisse , tumorem tamen , quacunque de causa nondum formatum fuisse ,

fuisse , tum quidem sub ipso partu difficili , capite
justo longius in osium pubis regionem impacto , aut
spina incurvata nimium , ob nifus matris , quibus fœ-
tum excludere tentat , partes per foramen illud in
osse relictum tum demum prorumpent , id quod
præcipue iis in herniis cerebri contingere autuma-
rem , ubi hernia superiorem capitis regionem , ut in
casu TREWIANO , occupat. Ast vertebrarum dissolu-
tionem , aut foramen p. n. in osse capitis sub ipso de-
mum partu laborioso fieri posse , vix crediderim.

§. X.

Signa diagnostica quod attinet , quibus affectus
noster cognosci , & ab aliis distingui potest , sunt se-
quentia : 1) ut tumor sit in infante , in adultis enim
hanc herniam nondum observatam fuisse §. VI. do-
cuimus : 2) ut sit connatus h. e. ut in infante statim
ac in lucem editus est observetur : 3) ut sit in ea ca-
pitis regione , quæ cerebrum includit , aut in regione
lumbari vel ossis sacri : 4) ut color cutis in tumore
sit naturalis , nisi gangræna corripitur , quæ tum
facile ex suis signis cognoscitur. 5) ut sit tactu mol-
lis. 6) ut , si in capite observetur , circulus osseus
in circumferentia radice tumoris digitis explorari
possit : 7) ut , si spina bifida sit , fluctuatio sentiat
aquarum in tumore , qui & tum haud raro trans-
parens esse solet ; quod si vero 8) eadem fluctuatio
in hernia cerebri sentitur , Hydro-Encephalocelen
inde cognoscere possumus. Qua ratione ab anevry-
smate spurio capitis possit distingui , his verbis do-
cet LE DRAN l. c. *dubius hæsi ab initio , cujus nam
naturæ sit iste tumor (cujus §. 2. descriptionem dedi-
mus) num sit hernia cerebri , num anevrysmata spurium a
ruptura parvæ cujusdam arteriæ capitis formatum.*
Notum

*Notum enim est, hisce in anevrysmatibus pulsum artc-
riæ non sentiri, ut in veris, ubi arteria tantummodo
dilatata est. Ut ergo ex incremento ejusdem circa na-
turam mali certior fierem, tumorem per sex dies in eo,
in quo erat, statu reliqui, quibus finitis, eundem non au-
ctum vidi: Et cum anevrysmata spuria quotidie crescant,
conclusi, illum non esse ejusdem speciei. Vidi enim plu-
ra in capitibus puerorum, vel ictibus vel tractione capil-
litii formata, quæ quotidie a sanguine per arteriam in-
desinenter fluente crescebant. &c. Et ut verum dicam,
utique in hernia cerebri simplici, illud, quod de nul-
lo incremento tumoris desumitur signum, aliquid
ponderis addere poterit. Ast in Hydro-Encephalo-
locele, ubi serum extravasatum capitis, ruptis præ-
sertim vasis lymphaticis, abundat, tumor quotidie
augeri potest, præterquam quod inde ad anevryisma
spurium concludendum sit, quo in casu ad diagno-
sin affectus, solus iste circuli ossei in radice tumoris
sensus sufficit, utpote nullo alio in casu reperiundus.*

§. XI.

Symptomata herniæ cerebri stricte sic dictæ, si
malum levius est, & supremam aut lateralem capi-
tis regionem, ut in LE DRANII TREWIIQUE observatio-
ne, occupat, primis temporibus fere sunt nulla, de-
formationem si excipias. Eo enim in casu elongari
quidem, non tamen comprimi possunt a parte cere-
bri excedente nervi, & cum ea elongatio sensim &
successive fiat, sub libera semper spirituum animalium
secretione & influxu in nervos vix mali quid-
quam gignitur. Non tamen negarem, posse, ni prin-
cipiis obstes, aucta cum ætate mole cerebri, his in

partibus spirituum animalium secretionem impediri, unde morbi ii qui hanc ut causam agnoscunt oriuntur. Majus vero malum a compressione ossis cum ætate indurati in protuberans cerebrum ejusque meninges & vasa oritur, unde inflammatio cum suis pedissequis gangræna & sphacelo aut suppuratione præstiterunt. Sed quid de futuris? præsentia potius considerabimus. Pejora symptomata alit Encephalocèle occiput occupans, ut in casu REISELIANO & nostro. Hic a prodeunte cerebro non possunt non medullæ oblongatæ & spinalis nervi comprimi, unde impedito spirituum in eos influxu paraplegia gignitur, quæ tamen non impedit, quo minus irritato cerebro abortisque convulsionibus misere interdum membra præcipue versus mortem contorqueantur. Si Hydro-Encephalocèle adest, una cum paralyfi fere universali aut motibus certe debilissimis apparebit quoque plenaria anæsthesia, quam, ni mors cito miseriis finem facit, atrophia & hæctica presso pede sequentur. Eadem symptomata fere excipiunt spinam bifidam, nisi quod paralyfis tantum inferiores artus occupet: rationem vide in schediasmate Cl. TREWII *l. c. p. 162. n. 5.*

§. XII.

Prognosis adfectus nostri sequentibus aphorismis includi potest. 1) Si hernia cerebri mediocris est, verticalis aut lateralis, vel nullam, vel exiguam lymphæ extravasatæ quantitatem admixtam habet, optima quæque circa curam sperare jubet. 2) Si hernia cerebri major sit, occipitalis, multamque lympham contineat, parum vel nihil spei de salute superesse

pereſſe videtur. 3) Trifte quoque, ſi non internecinum, eos, qui ſpina bifida laborant, manebit fatum. 4) Hernia cerebri verticalis & lateralis curam radicalem, occipitalis vero & ſpina bifida vix aliam niſi palliativam admittunt, licet in extremis morbis extrema quoque applicari poſſint remedia. 5) Ut hydrocephalus herniæ cerebri & medullæ ſpinalis cauſa nonnunquam & comes exiſtit, ſic & hi affectus in hydrocephalum terminari poſſunt. 6) Parum ſpei ſupereſt, ſi ſub parvis viribus vitæ excoriatio cuticulæ, inflammatio, atrophia, lipothymia, convulſiones malum ut ſymptomata concomitantur. 7) Exulceratio tumoris, ut in REISELI §. II. & BARTHOLINI §. VI. obſervationibus, mortis nuncia eſſe ſolet. 8) Quo remotior teſte RUYSCHIO a cerebro tumor ſpinæ bifidæ, eo diutius vivunt infantes.

§. XIII.

Ad curam delabimur. Qua ratione herniæ cerebri verticali & laterali medendum, & cur ita procedendum ſit, ex citatis §. II. LE DRANII TREWIIQUE obſervationibus petendum, ita ut ſupervacaneum foret, plura circa hæc addere. Sed altior de occipitalis & ſpinalis herniæ ſanatione ſurgit quæſtio. Liceat mihi, qui propria praxi deſtituor, lumina celeb. TREWII & B. SALTZMANNI ſequi, & cum malum conſiſtat 1) in morboſa cerebri, aut cerebelli, aut ſpinalis medullæ conſtitutione. 2) In lymphæ has partes irrigantis nimia collectione. 3) In harum partium eſſe ſede naturali dimotione. 4) In defectu partis offis occipitalis cranii vel proceſſuum ſpinoforum & obli-

quorum quarundam vertebrarum. 5) In expansione membranarum dictas partes involventium, nec non muscutorum vicinorum & integumentorum communium expansione, & in tumorem elevatione. 6) In paraplegia vel paralyfi inferiorum extremitatum: hinc requiritur, ut 1) cerebrum aut medulla spinalis roboretur, & a nimio sero expurgetur; 2) ut liquidum in tumore collectum exsiccetur, dissipetur aut evacuetur. 3) Ut partes e loco suo elapsæ reponantur, & contra injurias aëris defendantur. 4) ut ossificatio foraminum p. n. promoveatur 5) ut paraplegia vel paralyfis ista particularis roboratione membrorum infirmorum curetur. 6) Ut tumoris cystides vel contrahantur vel removeantur, cutisque obducta cicatrice consolidetur. 7) Ut symptomatibus reliquis urgentibus excoriationi, inflammationi, convulsionibus obviam eatur, non neglecta 8) roboratione vitalium virium. Nolo, quæ ad obtinendas hæc indicationes laudati in arte Antistites commendarunt indicata, hic prolixius repetere. Sufficiat saltem aliqua circa momentum secundum, tertium & quartum, in quibus præcipue casus nostri medela a medela casuum analogorum differt, monuisse.

§. XIV.

Lymphæ evacuationem, si exsiccare & dissipari ope medicamentorum (quod in tumore majore magis optandum quam sperandum est) nequit, arte, sive caustico sive lanceola promovere, ceu actionem, quæ mortem accelerat, serio & uno ore dissuadent observatores: conf. qui instar reliquorum esse

esse poterunt FORESTUS, TULPIUS, RUYSCHIUS. Hinc alii (vide JOB. A MECKREN & FOREST.) ligatura in radice tumoris facta, & quotidie magis angustata, eundem auferre malunt; sed næ isti ex scylla in charybdin incidunt, ignorant certe, quanto cum damno cerebrum protuberans aut spinalis medullæ nervi in tumore dispersi ligentur. conf. B. SALTZMANNUS l. c. §. 17. Alii vero, ut in paracentesi abdominis & thoracis fieri solet, non simul & semel sed sensim & repetitis vicibus evacuandam esse aquam suadent, prout suos curasse ægros HOFFMANNUS & APINUS gloriantur. Num ergo nostro in casu peccatum est, quod tumore lanceola aperto aquæeductæ sint? Minime, si rem accuratius pensitare velimus. Cystis aderat triplex; exterior, quam extravasata lymphæ vasorum subcutaneorum, elevando integumenta communia, formaverat, & interiores gemellæ, a cerebri parte una cum lymphæ excedente & meninges extendente figuratæ. De exteriori nullum forsân dubium remanet, etenim non solum cutim vulnuscule aperiri & lympham evacuari sine ullo periculo posse novimus, sed & illud ipsum urfit excoariatio cuticulæ, ceu signum imminenti corruptionis & sphaceli, qui educæ aquis melius præcaveri potuit, iis relictis necessario secutus fuisset. Sed altior circa cystides internas gemellas earumque aperturam quæstio. Ubi ni fallor, tria momenta erunt enucleanda 1) an dura mater tuto possit incidi? 2) an aquarum educæ per incisionem fuerit necessaria? 3) an eandem necessario, ut laudati modo observatores affirmant, mors excipiat? *Primum* quod attinet periculo vacare, si necessitas imperet, tot casus chirurgici loquuntur, ubi, quando post trepanationem sanguinem inter duram matrem & cere-

C 3

brum

brum hærere vident operadores , incisione in mem-
brana ista facta humorem , sine magnis exinde sub-
sequentibus symptomatibus , evacuant. De altero
momento res ipsa loquitur : non ignorarunt expe-
rientissimus Medicus & exercitatus in arte sua
Chirurgus , qui non , ut fieri solet , in sola aphæresi
barbæ & diæresi venæ , vitæ tempus consumserat ,
operationem periculo non vacare ; sed atrolivescens
cystidum internarum color , vasaque sanguine sta-
gnante turgidissima , præsentis inflammationis , gan-
grænationis incipientis & metuendæ sphacelationis
signa evidentissima , abunde docebant , lenta remedia
hic non conducere , nec exsiccationem dissipationem-
que lymphæ topicis externis aut internis remediis ten-
tandam , meliusque hic esse , anceps remedium experiri ,
quam nullum. Cum & inhumanum sit , sine remediis
relinquere ægrum , & anceps remedium a morte sæ-
pius liberaverit. Nec , quod *tertium* est momentum ,
necessario mors operationem sequitur , qua in re ha-
beo mecum consentientem Cl. TREWIUM , qui post-
quam docuisset , parvam in loco declivi tumoris fa-
ciendam esse aperturam , & educta aliqua lymphæ
parte , turunda denovo claudendam , *contra tot gra-
vissimorum virorum experientiam* (inquit in citato sche-
diasmate p. 167. no. 6.) *temere me hoc modo , si ape-
riatur tumor , acturum , nondum convictus sum*
*si lymphæ abundans paulatim educatur , si aëris acces-
sus provide præcaveatur , si neque medulla , aut cerebrum ,*
neque ejus propaggines lædantur , concedere nequeo , hanc
methodum producere posse ullam noxam , priusquam ex-
perientia , omnibus his cautelis indicatis sollicitè obser-
vatis , contrarium doceat. Quin e contrario talem
aperturam & lymphæ abundantis educationem exinde
necef-

necessariam judicet accuratissimus Medicus, *ut non solum medulla spinalis, vel cerebrum, a pressione & emolitione p. n. sensim sensimque liberentur, verum etiam unio integumentorum communium, & ossium, hiulcorum possibilis reddatur.* Has tamen cautelas nostro in casu observari non potuisse, urgens inflammationis membranarum symptoma quemvis docebit.

§. XV.

Eductis hoc modo aquis, partes prolapsas ab injuriis aeris defendendas, in locum suum reponendas, ossisque consolidationem seu ossificationem promovendam esse, supra §. XIII. monuimus. Optima utique ab aëre irruente partibus defensio procuratur, si parva in tumore fiat incisura, & lymphæ lente successiveque educatur. Novimus aërem per parvum foramen aqua clausum non irruere, dum interim ambientium calore hæ partes foventur. Si vero parva hæc apertura ob symptomata urgentia locum non habet, quin potius majorem requirat, pro rerum circumstantiis debitis linteaminum tegumentis vinculisque chirurgicis sibi prospiciet cautus & peritus operator. Sic fieri poterit, ut, sub lenta præfertim aquarum evacuatione, partes a pressione lymphæ liberatæ, tonum suum recuperent, sponteque retrocedant, sin minus, earum repositio tentanda erit. Ast quæ? aliam viam non novi ac eam, quam LE DRAN & TREW optimo cum successu calcarunt (vid. §. II.) ergo & hanc, si eum in locum res devenit, suaderem, tentarem. Cerebrum enim intestinorum
aut

aut uteri prolapsorum in modum reponi non posse, ipsa ejus structura mollis & pulpofa abunde docet, ni tum prolapsarum tum in situ suo relictarum partium compressione apoplexiam lethalem producere velis. Sed quid, si, ut in nostro casu factum est, plexus choroideus in tumorem hiet, faciendum erit? Ex casu analogo novimus, omentum, vel ex vulnere propendens, vel ficubi in hernia aperta reperiatur, ligari & innoxie abscindi, ne repositum gangræna corripatur, vicinasque partes eo ipso morbo inficiat. Num idem cum plexu nostro tentandum? suadet analogia, & idem gangrænationis metus imperare videtur: contraindicat diversa utriusque membranae structura, epiploi, multa pinguedine summæ & pessimæ corruptioni obnoxia referti, parvisque pro ratione molis suæ vasis minoribusque nervis scatentis, minus sensibilis, minusque, ut ex Physiologicis novimus, ad conservationem vitæ necessarij portio tuto aufertur, cum ligatura & abscissio membranae tenuissimæ, piæ matri cohærentis, nerveæ, sensibilissimæ, vasis, pro ratione molis, majoribus instructæ, haud infimum in vitam influxum habentis, utique altioris indaginis censenda sit. Nihil ergo circa hanc rem concludere ausim, donec optima rerum magistra experientia certi quid definire doceat. Repositione facta, partes in situ suo debitis vinculis chirurgicis continendæ, ossisque consolidatio seu ossificatio, adhibitis internis analepticis & citissime optimeque nutrientibus, naturæ committitur, dum interim integumentorum vulnus inflictum ex arte clauditur. Et hæc sunt quæ pro ingenii modulo circa arduum in evolutione & curatione morbum in compendio tradere con-

constitui, si minus perfecta sunt, ut B. L. juveni & propria experientia destituto, illud indulgeat enixe rogitō. Tibi vcrō sanitatis omniumque bonorum fons & origo, ARCHIATER summe, pro concessa mihi gratia sit Laus, Honor & Gloria!

FIGURARUM EXPLICATIO.

TABULA I.

- Fig. I. Infantem cum tumore integro offert, ubi
 A. ipse tumor.
 B. Radix tumoris capillata.
 C. Fundus tumoris calvus.
 D.E. Excoriationes cuticulæ.
- Fig. II. Tumorem cute denudatum sistit, hic
 F. Cutis cruciatim incisæ labra, quæ cystidem externam formarunt.
 G. Cystis interna sinistra, major & rotunda.
 H. Cystis interna dextra, minor & oblonga.
 I. Linea, duas cystides separans.
 K. Vasa copiosa sanguine hinc inde stagnante turgida.

TABULA II.

Fig. III Tumorem cultro anatomico apertum monstrat,
in qua lit.

L. Cutis eadem labra, quæ in Fig. 2. Lit. F. designantur.

M. Tumoris sinistri cystis discissa.

N. Tumoris dextri cystis discissa.

O. Ventriculus tertius.

P. Portio plexus choroidei, ex ventriculo propendens.

Q. Portio cerebelli.

R. Lobi posteriores cerebri.

Fig. IV. Os occipitale denudatum cum foramine p. n. oculis exponit.

S. S. Os occipitale.

T. T. Incisuræ p. n. in osse, ob ossificationis defectum relictæ.

V. Foramen præternaturale.

X. X. Foraminis magni occipitalis portio.

Y. Ligamentum intermedium, foramen p. n. a foramine magno occipitali dirimens.



Fig. I.





Fig. II.






Fig. III.




Fig. IV.

